

Преподобному и Богоносному отцу нашему Иоанну Дамаскину
акафист

Кондак 1, глас 8: Взбранной Воеводе:

Избраннаго сосуда благодати Божия,
Иоанна Богохвальнаго, притецем вси восхвалити
от Дамаска ўбо града звезду всесветло возшедшую,
Вселенския же Церкви свирель приснопоющую Божественных таин
истину,
пренебрегшаго славу мира славы ради Христа Бога,
да вознесем ему молитву радования:

Радуйся, преподобне Иоанне, Дамаска славо и вселенныя православное
утверждение.

Икос 1.

Ангелонравно житие твое предпочёт, Иоанне благознамените, принесл еси
жертву Христу великосановныя жизни отречения: сице и от мудрости человеци
почёрп, наипаче возлюбил еси Божия премудрости сладость и, в пустыни
смирения вселься, изъяснил еси правыя веры высот простоту. Сего ради, яко
Божественных учений источнику, взываем ти:

Радуйся, светильниче Божественнаго света, сияй в нощи неверия;
радуйся, поклонниче истинныя веры, умудряй словесы Богопознания.
Радуйся, благознаменитаго рода отрасли;
радуйся, смиренномудраго преподобия образе.
Радуйся, процветшая во среде агарян христианская похвало;
радуйся, прозябшее во тщеславнем мире кротости Христовы преподобие.
Радуйся, от философ мира наученный;
радуйся, от премудрости Божия умудренный.
Радуйся, яко воздал еси Божие Богови;
радуйся, яко презрел еси красная царская, да наследыши Царство вечное.

Радуйся, благодати Божия тезоимените;
радуйся, Церкви священнейший пресвитере.

Радуйся, преподобне Иоанне, Дамаска славо и вселенныя православное утверждение.

Кондак 2.

Видя Бог, яко семя, Им посажденное, в добру землю падé и хóщет плод многобогат принести, упасл есть дом твой, Иоанне Дамаскине, родителев, в Христове вере утверждён, яко да неудобоприятно тернию явіт в нем Богоприятную розгú, всемирно песнословящую: Аллилуия.

Икос 2.

Разума высокоумудрие посрамляется, видящим нам перваго советника властителя агáрянскаго, власть страны иноверныя велию имúща, уничижённым же и гонимым прилежаща сердцем, обидимым и досаждаемым помогающа: темже и ныне припадем ко Иоанну, о нас печальнику, да ны услышит к нему вопиющия:

Радуйся, христоролюбивыя паствы благий управителю;

радуйся, ангелоподобный в бедáх сúщим хранителю.

Радуйся, аки добрый самарянин больным прилежавый;

радуйся, благими дéлы Христа проповéдавый.

Радуйся, еже работати Богови в безмолвии возжелéвый;

радуйся, обаче кротце повинувыйся властём, да послужиши державе твоей.

Радуйся, всяку власть, яко от Бога сущу, почитавый;

радуйся, от смирения великая обретáвый.

Радуйся, яко рода твоего преславная во мнозе удобрил еси;

радуйся, превозшедый в разуме и славе наставников и сродников твоих.

Радуйся, яко волю сердца твоего воли Божии приклонил еси;

радуйся, яко веры твоя огонь в сердца твоем присно пламенеющ всяко соблюл еси.

Радуйся, преподобне Иоанне, Дамаска славо и вселенныя православное утверждение.

Кондак 3.

Силе Вышняго противу быти не могий, Иоанне Богопослушне, царя иконоборца не убоялся еси: подобя бо ся Иоанну Предтечи, ревностнаго словесё не удержал еси, да научиши люди, кланяющесе во иконе Первообразу, взывати Богови: Аллилуия.

Икос 3.

Имея внутрь себе Божественныя славы ревность, возвысил еси глас твой, Иоанне Дамаскине, и писаньми обличил еси хульникий церковныя, да отщети́тся тех зломыслие. Сих ради бывших о тебе, славне, славим тя:

Радуйся, перваго честнаго Богословия добрый последователю;

радуйся, внёмлющих даже до ныне словесным млеком питателю.

Радуйся, слова Божия меч вземый, яко да еретическаго мудрования главу усékнеши;

радуйся, предания Церковнаго преемниче, имже веры изменения избéгнеши.

Радуйся, словом изъяснёй Христову веру;

радуйся, яко от мудрости мира небесных изложил еси премудрая.

Радуйся, грóмов гласе богослóвствуй;

радуйся, некрадомое слова Божия богатство.

Радуйся, Церковнаго здания плíнфо несокрушимая;

радуйся, ниедино от вражия лести поколеблемь бывый.

Радуйся, основания Богомудрых мужей пробáвителю;

радуйся, благоглаголивых отцев сорадéтелю.

Радуйся, преподобне Иоанне, Дамаска славо и вселенныя православное утверждение.

Кондак 4.

Бури злокозненные клеветы восприял еси обстояние, преподобне богослове, богословия ради твоего. Се, един царь иному подобие письма твоего пишет, яко аще предательство мнил еси в нем: се, лжехристов Христова сарацину предает на казнь, Иуды подражатель, да яко умолчат уста, глаголющая право: Аллилуия.

Икос 4.

Благоуслышася навет о тебе во ушью царя Дамаскова: оглагольству бо подложныя хартии веру ят, никако оправданий словесé невиннаго Иоанна Боголюбца послуша повелитель: на усечение десницы предаде его, ёюже письменне вси хулящии Бога бяху обличалися, но сего ради “радуйся” тебе, о, Иоанне, воспоем:

Радуйся, ведый, яко на право славящия Бога козни вражия изобилуют;

радуйся, тех претерпевый довольное даже до крове действо.

Радуйся, мученическому лику сопричетниче;

радуйся, исповедником Христовым истый обещниче.

Радуйся, рукó Боговодительствуемая;

радуйся, льстиваго врага доблий одолетелю.

Радуйся, изъяснительное Неописаннаго писание;

радуйся, лукаваго действия посрамление.

Радуйся, яко от завистников стрел страждеши;

радуйся, яко теми уязвляемь, правды Божия не отрекаешися.

Радуйся, яко кровию вместо чернил руку твою омочил еси;

радуйся, яко по казни, Божия Матере и Господа попечению ся предал еси.

Радуйся, преподобне Иоанне, Дамаска славо и вселенныя православное утверждение.

Кондак 5.

Боготечныя звезды славу подражаючи, явися десница твоя, Иоанне

Богоносе, яко волхвѡм, указующая людем, како могут поклонение право принести Богу, во образе убо зряще Сущаго, в пении же Тому поюще: Аллилуия.

Икос 5.

Виде Пречистая Владычица Иоанна припадающа ко образу Ея, в болезни стенящаго, усеченную десницу прилагающа, и по вере своей на Ея помощь уповающа: вся бо содеяти может, яко Мати Божия, хотящи. Явися же ему во сне Пречистая, приемлющи обет того, писанными не престати восхваляя Бога и Богородительницу; и се, исцеление удобъ даровъ руцѣ вернаго, емуже мы возопиим:

Радуйся, благоговейный к Богу молебниче;

радуйся, Богородицы Пречистыя дерзновенный беседниче.

Радуйся, яко во ушию Ея бысть молитва твоя;

радуйся, яко внят Ходатаице вседержавный Сын Ея, еже исцелити тя.

Радуйся, всемошнѣго покровѣ Богоматере ликование;

радуйся, неистошчимыя благодати небесныя приятелище.

Радуйся, непосрамленное упование на Господа;

радуйся, цельбы небесныя и нам ныне прошение.

Радуйся, чудесѣ Божия свидетелю:

радуйся, оглаблѣнных, в болезнях сущих и в мучениих приятелю.

Радуйся, яко Всемогущаго Врача лекарство уллучил еси;

радуйся, яко Тому, в вере паки укреплься, всем животом послужил еси.

Радуйся, преподобне Иоанне, Дамаска славо и вселенныя православное утверждение.

Кондак 6.

Проповеда поклоняемаго тобою Бога чудо исцеления твоего, пред царем сарацинским: «Горе мне!», — проглаголати убо увещавшее, неправеднаго же бусловия того подавше разумение. Ты же, Иоанне Богоблаженне, воспел еси

десницы Вышняго Божественную силу: Аллилуия.

Икос 6.

Сияние святыни твоя явися пред царя дамаскаго, не удержа бо лести власть на сердцы невернаго властителя властитель лести, о, Иоанне праведне. Честь же сана хотя ти возвратити и власти полноту, услыша ты князь, к ногу его припадша просяща, да пúстит ты, по Господе ити монахом. Еда убо о сем смиреннии не воспойм избраннаго Христова сице?

Радуйся, праведнаго жития оправдание;

радуйся, преподобнаго жительство желание.

Радуйся, Богоматерняго чудесé сопричастниче;

радуйся, Христовы истины изъяснение.

Радуйся, срамляющим яже о Христе обидимыя срамление;

радуйся, благословляющим яже благотворящия о Бозе благословение.

Радуйся, Божия чудесé явление;

радуйся, яко явился еси Богоневестныя Матере Иисусовы благоволение.

Радуйся, иноческаго жития чайтелю;

радуйся, красных земных, любве ради Божия, отревателю.

Радуйся, соблазну не имевый места в сердцы твоём;

радуйся, яко оно точию любве и кротости исполнил еси.

Радуйся, преподобне Иоанне, Дамаска славо и вселенныя православное утверждение.

Кондак 7.

Хотящу ти воздати слово право Богу и в нищету смирения облещися, рабе благий Христов, рабы твоя пустил и вся имения раздал еси, в работу предложитися грядя монаха. Тем убо во обитель пришедый святаго Саввы, игуменом прият, хвалебная воспел еси: Аллилуия.

Икос 7.

Новых подвигов ристалище себе стяжал еси, Иоанне, воине Христов, едина старца во учителя приемь, яко да смирению научит тя и послушанию: се, да не преждних чесó творил бы, аще и благих, по твоей воли, но воля старца, и безмолвие, и сердца чистота, и труд работен тебе во образ бытия вменишася: сего же ради радуйся, блаженне Иоанне:

Радуйся, добродетельнаго жительствова фимиаме;

радуйся, о гресех преждния жизни слез пролитие.

Радуйся, телесными труды украшэйся;

радуйся, духовными подвиги преображэйся.

Радуйся, Богогласная трубо, смирения ради умолчавшая;

радуйся, яко исцелённую рукою писало отложил еси во избежание превозношения мысленнаго.

Радуйся, телесно здрав, душу уврачевати пришедый;

радуйся, обоя от Творца приемый.

Радуйся, высотó смиренномудрия;

радуйся, красотó Христова подражания.

Радуйся, прекословия и ропота в сердца твоем не познавый;

радуйся, змия гнева и сумнения из помысл твоих изгнавый.

Радуйся, преподобне Иоанне, Дамаска славо и вселенная православное утверждение.

Кондак 8.

Странное и Ангелом, и человеком бысть видети тя, Иоанне Богоносе, во граде бывшия твоея славы вретисцем оболчённаго, по послушанию кóшницы драгия ищуща продáти; обаче о такомём не поревновав унижению, помогшаго ти Бога благословение духовнаго отца исполнити, хваля́ прославил еси:

Аллилуия.

Икос 8.

Весь быв горних исполнь, Иоанне Богословесниче, обрелся еси от старца обличаемь, аки Адам преслушанием подпад рая отлучению, в дольных хотение вмени бо той о едином брате заупокойное твое пение, еже, умолен быв, сотворил бе ты: мы же, тебе поюще славная, во усладе райстей днесь веруем тя быти:

Радуйся, сердце имый состраждущее;

радуйся, внемляй слезе просящаго.

Радуйся, пояй славу ко Христу отшедших;

радуйся, услаждай живых о радости небес достигших.

Радуйся, покаяния пред смертию молитву в песни пролити научаяй;

радуйся, вся тленная греховная пред сретением Господа оставити взываяй.

Радуйся, оставил бо еси высокая земная;

радуйся, наследил бо еси сих ради превыспренняя небесная.

Радуйся, послушания всякаго исполнение на ся вземый;

радуйся, в преслушании покаяние действенное давай.

Радуйся, яко, греха ради исправления, гнуса не возгнушался еси;

радуйся, яко искуса ради неудобоприятная претерпел еси.

Радуйся, преподобне Иоанне, Дамаска славо и вселенная православное утверждение.

Кондак 9.

Всякое естество бы пренебрэгло наложеннаго на тя, Иоанне смиреннолюбче, прещения, аще и монашескими украшено: но твое зря старец на унижения благоприятие, ти Спребывающа воспе смиренна сердцем и кроткаго Христа: Аллилуия.

Икос 9.

Ветий глаголющих праздно слово, благовещанна мудролюбца Иоанна тщася воспети добродетель: не убо той своею волею, но волею Пречистыя

Владычицы, ко старцу его явльшиися, откры уста своя, Господь же та исполни Духа, да Сей и нам поможет, блаженне, “радуйся” тебе воспети:

Радуйся, всякия плоти радость о Богородице воспевай;
радуйся, яко велением Пренепорочных из устну твоею тоцы Богословия излияшася.

Радуйся, общежительнаго жития согласие;
радуйся, монашескую мнивый келлию яко рая блаженство.
Радуйся, неизждивное ангелоподобное пение;
радуйся, яко до ныне преподобными гласы твоими Бога воспеваеши.
Радуйся, славу обретый в безславии земнем;
радуйся, соблазна избегый в величиих дольных.
Радуйся, о Царь Бозе раба себе содеявый;
радуйся, рабство земных власти презревый.
Радуйся, еже славити Бога меде устом нашим;
радуйся, Богословия необинуемаго златословесниче.

Радуйся, преподобне Иоанне, Дамаска славо и вселенная православное утверждение.

Кондак 10.

Спасения людем хотящаго Бога прославил еси, достоблаженне Иоанне Богоревнителю, да некако разумы отвергнутся Творца, умно человеки призываяй пети Иже греха жало смертное от человек отъемшаго: Аллилуия.

Икос 10.

Стены Церковныя ограды часть быв, святыи угодниче Дамаскине, твоя души врагу не дал еси, ни телесу Церковнаго растлити словеса блазными: не измышлений басни рек, но посещения сподоблься Духа Божия, вещал еси, о, Иоанне, Божественная оправдания, о нихже сице благодарственне ти восписуем:

Радуйся, Бога созерцающее сердце;

радуйся, духоначертáнное писание.

Радуйся, возшедый на мысленный Синай Боговидения;

радуйся, из глубины смирения на Церковную гору святыни вознесыйся.

Радуйся, святителей твердое Богомыслие;

радуйся, преподобных тишинó смиренномудрая.

Радуйся, иереем священныя тайны изъяснение;

радуйся, ниже кому затворей сладости Богопознания истину.

Радуйся, возлюблей не обинуяся последовати правде;

радуйся, из келлии воздержания не удержавый плодобогатство в духовных чадех.

Радуйся, светильниче света пребожественнаго;

радуйся, сению мантии иноческаго покрывый брэнную мира славу.

Радуйся, преподобне Иоанне, Дамаска славо и вселенныя православное утверждение.

Кондак 11.

Поющим нам Богопознания основ неисчислима тобою пеня, благий Христов ученичэ Иоанне, не тощих тщимся подражати глаголов множество, но уверения Божественнаго силу зряще в словесех твоих, не премолчим в тебе Святаго Духа действия, глаголюще: Аллилуия.

Икос 11.

Светосиянную надежду живота вечнаго в творения твоя вдохнул еси: всем, иже погребсти имущим, жестоковыйных показал еси отход и красных тлен, имиже сокровищствуют людие. В тебе же видим, блаже Иоанне Дамаскине, по преставлении твоём, яко довольне послужу Богу, святое восприятие: темже, аще и скудную, прими от нас песнь сию:

Радуйся, у гроба плачущия утешая;

радуйся, глаголы усопших нам песенно вещая.

Радуйся, молитвенное воздыхание о грядущих ко Господеви;

радуйся, пагубы вечныя живым предображение.

Радуйся, словеснаго врачевания начальниче;

радуйся, догматического наказания реснотó.

Радуйся, будущия жизни в горних яснозрителю;

радуйся, о в нераскаянных гресех печали повествователю.

Радуйся, песнями твоими упреждаяй смерти страх;

радуйся, научаяй страха Божия на человецех утверждению.

Радуйся, деснице, крепостию писаний благолепно прославленная;

радуйся, разуме, просвещаяй концы.

Радуйся, преподобне Иоанне, Дамаска славо и вселенныя православное утверждение.

Кондак 12.

Благодати Дателя вольно восприял еси разумом — и сердцем, яко сый раб Господень, рабства, Иоанне, мнимаго не убоялся еси, лукавыя работы отвёргий союз, победно восклицая: Аллилуия.

Икос 12.

Поем воспевшаго горних славу, Иоанна всебогатаго: того дивляемся благоплодоносию, образа учения и мудрости высоты, смирения же тишины велегласныя, явися бо вселенней православное исправление и древних христороубцев корень, ему же уста наша да не закоснеют выну пети:

Радуйся, духовнаго наследия сокровище;

радуйся, млека словеснаго о спасении изобильное истечение.

Радуйся, на земли воспевый, аки ангелов лик, славу воскресения Христа;

радуйся, славословьяй ныне Господа у Престола Того на небесех.

Радуйся, Божия Матере словесная похвалó;

радуйся, Царствия небеснаго живописателю.

Радуйся, смоковнице, плод твой во время свое преизобильно давая;

радуйся, усладившее смоквами словес твоих благокоренное древо

Христовы веры.

Радуйся, цвѣте благоуха́яй истиною;

радуйся, еретическаго зловония истощи́телю.

Радуйся, славы Божия многоплодное писание;

радуйся, веры Христовы неиздивительное учение.

Радуйся, преподобне Иоанне, Дамаска славо и вселенная православное утверждение.

Кондак 13.

О, великий песнослове Иоанне Дамаскине, веры Христовы добльственныи ратниче и учителю, велича́яй на земли горних Божественную славу и дольных научаяи смыслы истины! Да не будут тице тебе молитвы наша: услади нас поучении твоими и небесным заступничеством огради нас, да небла́зненно со святынею твоею Великаго поем и величаем Бога: Аллилуия.

Этот кондак читается трижды, затем 1-й икос и 1-й кондак.

Молитва первая

О, преподобне, священне Иоанне Богославный, Дамаскова похвало, вселенная православная велелепото: к тебе течем, к тебе молимся, Божественный Дамаскине: не престаи прочее моляся ко Пречистой Богородице, зане убо и в житии твоём земном послуша тя. Выну паки пребуди молитва твоя о нас ко Господеви Богу нашему, Егоже Церковь ревностно, аки доблий ратник, от ересей и со истиннаго пути поползновения защитил еси. Святыи Божий, угодниче преблагий. Ты, якоже Соломон, ничесомже испрошь у Господа, разве премудрости Божия, ктому и смирения наказания, ничимже лишен был еси и в правлении страны твоя и неверная имел еси часть богатую: но тем убо паче показался еси истинный христианин, в помощи пребывая убогим, оглабланым, о правей вере гонимым и угнетаемым. Помози нам, Иоанне, соблюстися, еда како отступим чим малым от Христа Бога нашего и Его Вселенския Церкви; огради святынею твоею, нами ныне песнословимую, от

зломыслящих нам врагов видимых, наипаче же от невидимых духов злобы поднебесныя. Научи ны, святче Иоанне, отишию сердечному, разума здравомыслию, в вере несумнению, ктому же любви яже о Христе Иисусе, еюже изрядне украсился еси, Божественне Дамаскине. Буди присный ходатай и помощник во учении пребывающим: умудри я, уцеломудри, просвети еже у Престола Божия ходатайством; с высоты горния славы испроси вся, яже суть полезна спасения чающим и о славе Божией zde долу пекущимся. Подаждь слово благо и твердо наставником, да Церкви верныя сыны воспитают и чада достойна державе Российстей сотворят. Попецыся и о еже смирению и кротости сердца научиться нам, якоже обоюдоостру мечу, имже отсекается врага человеческого плетение. Не остави когждо просящаго Chesо у тебе в молитве, о благих делех благослови и настави, да непреткновенно во славу Царства Небеснаго поживем, идеже со Владычицею Богородицею Мариєю и святыми всеми, в нихже и ты еси, неизреченное Господне благословится имя, Отца, и Сына, и Святаго Духа, всегда, ныне и присно, и во веки веков: аминь.

Молитва вторая, рекомая от собрания семинарскаго Нижняго Нова Града.

Божественне Дамаскине, святыи наш покровителю, отче Иоанне преподобне, небеснаго наследия учителю, пастырей наставителю, глаголе ясный учащих и благое учащихся внимание! Се, мы ныне слово ти хотяще молебное рещи, памятуем тя храма нижеградска именованье, при немже иногда духовная основася семинария. И в нынешнем убо собрании не оставляем притекати ко твоей святыни и молитвенную жертву о тебе, нашем небеснем заступителю Христу Иисусу и Всеблазёй твоей Отраде, Владычице нашей Богородице Марии, принести тщимся: о небесных бо твое сотворил еси рачение, живот земный в жизнь пробавль вечную о Бозе. Темже убо прошед путем неудобоходимым, удобь нам уготавлиаши в Царствие Небесное стези во учении твоём простем и всецелом о Господе Иисусе твоём житии. О, Крестителей соимените, Христовых путей сказателю и от иноходения духовнаго в великомыслии ульщеных препяте, Верховнаго умоли

Вседержителя державу нашу православну соблюсти, от ересей и раскол тело оградити Церковное, власти и воинства народолюбны и людем благочестивым служительны сохранити и врагов Отечества Христолюбиваго скоры на побеждение содеяти, разуму же нашему подати ясность евангельскую и сердцу о любви Божественной простоту. Сый наследия отческаго часть Дамаскине, Православия полноты покажи ны преемники, о, великий Иоанне, велелепото Церковная! Темже и в конце нашем, аще и чим преступихом пред святынею правды Божия, испроси у Законоположника, но и паки Всещедраго Судии, прости нам, яко ничесомже благаго сотворшим, зане не к кому бо иному в печали или прошении припадехом, никому же иному возвращеся паки поклонихомся, точию Христу Иисусу распятому и воскресшу, Сыну Божию, в Немже и Отцу Всевышнему, со Духом Его Пресвятым, Божественной бо сей Троице буди слава во веки всевечныя: аминь.